

- विधानसभा उपचुनाव सारू प्रचार मांय तेजी-भाजपा अर कांग्रेस रा नेतावां रा पार्टी प्रत्याशियां सारू केई जगहां दौरा।
- उपचुनाव सारू आज ऊं 6 विधानसभा हलकां मांय पात्र दिव्यांग अर बुजुर्ग मतदातावां सारू घर ऊं मतदान री प्रक्रिया शुरू-दौसा मांय होम वोटिंग 6 नवम्बर ऊं।
- जोधपुर मांय इन्वेस्टर्स मीट मांय 17 हजार 350 करोड़ रुपया रा 289 एमओयू व्ह्या।
- प्रदेश रा अधिकतर स्थानां माथे रात रा तापमान मांय गिरावट- फतेहपुर मांय सब ऊं कम 12 दशमलव 7 डिग्री सैल्सियस तापमान दर्ज।

000

प्रदेश री सात विधानसभा सीटां माथे व्हे रह्या उपचुनाव सारू प्रचार तेज व्हे ग्यो है। भाजपा अर कांग्रेस रा केई नेता आज पार्टी प्रत्याशियां सारू प्रचार कीनो। भाजपा नेता अर उप मुख्यमंत्री दिया कुमारी आज टोंक जिला रा दूनी मांय देवली-उनियारा ऊं भाजपा रा उम्मीदवार रा चुनाव कार्यालय रो उद्घाटन कीनो। भाजपा नेता अर मंत्री किरोड़ी लाल मीणा आज दौसा विधानसभा क्षेत्र रा न्यारा-न्यारा गांवां रो दौरा कर र पार्टी रा उम्मीदवार सारू प्रचार कर्यो। राज्य सरकार रा केई मंत्री अर पदाधिकारी ई भाजपा प्रत्याशियां रा चुनाव प्रचार मांय जुट्योडा है। कांग्रेस नेता सचिन पायलट ई आज दौसा ऊं कांग्रेस रा उम्मीदवार दीन दयाल बैरवा रा समर्थन मांय भांडारेज, मेडोली, कोर्रा समेत केई गांवां मांय जनसंपर्क कीनो। खींवसर मांय आरएलपी नेता हनुमान बेनीवाल ई पार्टी रा उम्मीदवार रा चुनाव प्रचार मांय लाग्योडा है।

000

राज्य री सात विधानसभा सीटां रा उप चुनाव सारू आज ऊं दिव्यांग मतदातावां अर बुजुर्ग सारू घर ऊं वोट देवण री सुविधा सरू करीजी है। पात्र दिव्यांग मतदाता अर 85 साल ऊं बत्ती उम्र रा बुजुर्ग 10 नवम्बर ताई घर ऊं वोट दे सकेला। ई सुविधा सारू 3 हजार ऊं बत्ता पात्र मतदाता अर्जियां दीनी है। आं मांय 2 हजार 365 बुजुर्ग अर 828 दिव्यांग मतदाता शामिल है। निर्वाचन विभाग री ओर ऊं होम वोटिंग सारू कुल 87 टीमां बणाई ज्यी है। झुंझुनूं विधानसभा हलका मांय नयासर निवासी 100 साल री बुजुर्ग महिला राबिया बानो घर ऊं वोट दीनो। ई हलका ऊं 585 पात्र मतदाता ई सुविधा सारू नाम मंडाया है। डूंगरपुर रा चौरासी मांय आज 85 साल री बुजुर्ग महिला धापू मतदान कीनो। वठे 319 बुजुर्ग अर दिव्यांग मतदाता होम वोटिंग सारू पंजीकरण करवायो है। सलूम्बर मांय होम वोटिंग सारू 12 समर्पित मतदान दल बणायी ज्यो है। जिला मांय 683 मतदाता घर ऊं वोट डालबा री सुविधा सारू पंजीकरण करायो है। दौसा मांय 6 नवम्बर ऊं होम वोटिंग री सरूआत व्हेला।

रामगढ़, दौसा, देवली-उनियारा, झुंझुनूं, खींवसर, सलूम्बर अर चौरासी विधानसभा हलकां मांय 30 अक्टूबर ने फौजियां ने मतपत्र जारी व्हेवण सागे ई मतदान री औपचारिक सरूआत व्हे ग्यी ही। अ मतपत्र 23 नवम्बर ने मतगणना सरू व्हेवण ऊं पैली ताई स्वीकार व्हेला। आं हलकां मांय 13 नवम्बर ने ईवीएम रे जरिए वोट पड़ेला। वोटों री गिणती 23 नवम्बर ने करी जावेला।

आं सात सीटां माथे आसान मतदान सारू प्रशासनिक तैयारियां ई जारी है। डूंगरपुर जिला रा चौरासी विधानसभा हलका सारू नियुक्त सामान्य प्रेक्षक के. विवेकानंदन उपचुनाव बाबत बणायी ज्या एकीकृत नियंत्रण कक्ष रो दौरा कीनो। वे सोशल मीडिया माथे हेट स्पीच अर भ्रामक कंटेंट परां सतत निगरानी राखण रा निर्देश दिया। वे डूंगरपुर एसपीबी कॉलेज मांय स्ट्रॉंग रूम, मतदान दलां री खानगी ऊं पैली प्रशिक्षण स्थल अर मतगणना स्थल री व्यवस्थावां रो ई जायजो लीनो।

प्रदेश मांय सात सीटां माथे व्हे रह्या उप चुनाव बीचे नागौर रा पूर्व जिला कांग्रेस अध्यक्ष सुखवीर सिंह चौधरी समेत 14 नेता आज भाजपा री सदस्यता ग्रहण कर लीनी। भाजपा रा प्रदेश कार्यालय मांय प्रदेश अध्यक्ष मदन राठौड़ अर प्रदेश उपाध्यक्ष ज्योति मिर्धा री मौजूदगी मांय नागौर री राजनीति मांय सक्रिय भूमिका निभावण वाळा कांग्रेस रा पूर्व जिलाध्यक्ष सुखवीर सिंह चौधरी सरपंच, जिला परिषद सदस्य, पूर्व सदस्यां सागे भाजपा परिवार री सदस्यता ग्रहण कीनी। ई रे अलावा सवाईमाधोपुर ऊं पार्षद असीम खां ई भाजपा री सदस्यता लीनी। ई मौके श्री राठौड़ कह्यो के प्रधानमंत्री नरेंद्र मोदी रा नेतृत्व मांय आज आमजन भाजपा री रीति अर नीति मांय विश्वास जता रह्यो है, जदके कांग्रेस री गलत नीतियां रा चालता वां रो मूल कार्यकर्ता पार्टी ऊं दूर व्हे रह्यो है।

000

उपराष्ट्रपति जगदीप धनखड़ कह्यो है के प्रशासनिक अधिकारियां ने राष्ट्रवाद रा मूल्यां सागे बिना पक्षपात सगळा भारतीय नागरिकां री सेवा सारू प्रतिबद्ध रेहवणो चाहिजे। वे आज नई दिल्ली मांय भारतीय लोक प्रशासन संस्थान-आई.आई.पी.ए. री 70वीं वार्षिक बैठक री अध्यक्षता कर रह्या हा। श्री धनखड़ कह्यो के देश तेजी ऊं औपनिवेशिक मानसिकता रो त्याग कर रह्यो है। वे कह्यो के डेटा, समाज री जरूरतां रो आकलन करण रो मौलिक आधार है।

000

केन्द्रीय सामाजिक न्याय अर अधिकारिता राज्य मंत्री बीएल वर्मा एक दिन रा दौरा रा तैत आज चित्तौड़गढ़ पूग्या। वे सर्किट हाऊस मांय पत्रकारां सागे बातचीत मांय कह्यो के प्रधानमंत्री मोदी री आर्थिक नीतियां अर विकास री सोच रे चालता आज भारत री अर्थव्यवस्था 11वां स्थान ऊं 5वां स्थान माथे आ गयी है।

वे कह्यो के प्रधानमंत्री रो विजन है के 2047 मांय भारत जब आजादी रा 100 साल पूरा कर रह्यो व्हेला तब भारत एक विकसित राष्ट्र बण जावेला। केन्द्रीय राज्य मंत्री आज सांवलिया जी मिन्दर मांय दर्शन कर र देश री सुख समृद्धि री कामना कीनी।

000

राइजिंग राजस्थान ग्लोबल इन्वेस्टमेंट समिट ऊं पैली स्थानीय स्तर परां व्हे रही इन्वेस्टर्स मीट री कड़ी मांय आज जोधपुर मांय आयोजन व्ह्यो। संसदीय कार्य, विधि अर न्याय मंत्री जोगाराम पटेल री मौजूदगी मांय जोधपुर रा 289 निवेशकां ऊं एमओयू करी ज्यो। इण ऊं जिला मांय 17 हजार 350 करोड़ रुपया रो नुवो निवेश आवेला। साथ ही रोजगार रा 57 हजार नुवा मौका मिलेला। कार्यक्रम मांय सांसद राजेंद्र गहलोत, नगर निगम दक्षिण री महापौर वनिता सेठ, विधायक अतुल भंसाली अर देवेंद्र जोशी, जिला कलेक्टर गौरव अग्रवाल उपस्थित रह्या। कार्यक्रम रे दौरान एक जिला एक उत्पाद योजना रा तैत चुण्ठी ज्या उत्पादां रे अलावा जोधपुर रा खास सामान री प्रदर्शनी लगायी ज्यी।

000

लोकसभा अध्यक्ष ओम बिरला आज कोटा री भामाशाह कृषि उपज मंडी मांय कोटा ग्रेन एंड सीड्स मर्चेण्ट एसोसिएशन रा दीपावली पाछे आयोजित मुहूर्त पूजन मांय भाग लीनो। श्री बिरला विधिवत पूजा अर आरती कर र नीलामी री सरुआत कीनी अर अन्नदाता किसानां सारु अच्छी उपज अर सुख-समृद्धि री कामना कीनी। देश री मोटी अनाज मंडी मांय शामिल भामाशाह मंडी मांय हर साल दीपावली पाछे नई फसल सारु मुहूर्त पूजन कर्यो जावे है।

0000

पूर्व मंत्री गुरजंटसिंह बराड़ री पार्थिव देह रो आज वां रा पैतृक गांव पांच एलएनपी मांय राजकीय सम्मान रे साथे अंतिम संस्कार कर्यो गयो। पुलिस री ओर ऊं वां ने सलामी दी गई। इण ऊं पैली वां रा आवास माथे मोटी तादाद मांय जनप्रतिनिधि, प्रशासनिक अधिकारी अर आमजन वां रा अन्तिम दर्शन कीना।

000

प्रदेश मांय गुरु नानक देव जी रा प्रकाशोत्सव पखवाडा रा तैत केई धार्मिक आयोजन व्हे रहया है। भरतपुर रा बयाना मांय आज इण ई सिलसिला मांय प्रभात फेरी निकाळी ज्यी। कस्बा रा मुख्य मार्गा ऊं व्हेती थकी प्रभात फेरी गुरुद्वारा माथे जा र पूरी व्ही। ई दौरान गुरुद्वारा मांय शबद कीर्तन राख्यी ज्यो अर सत्य रा मार्ग माथे चालण रा नानक जी रा संदेश ने आत्मसात करण री सीख दी गई। बाद मांय अटूट लंगर रो आयोजन करी ज्यो जिण मांय मोटी तादाद मांय श्रद्धालू प्रसाद लीनो।

000

प्रदेश मांय रात री बगत ठंडक मांय बघोतरी व्हेवण लागी है। अधिकतर स्थानां परां रात रा तापमान मांय गिरावट व्ही है। सब ऊं ज्यादा साढे 9 डिग्री री गिरावट फलौदी रा तापमान मांय व्ही। हाल फिलहाल प्रदेश रा 6 स्थानां माथे रात रो पारो 15 डिग्री सैल्सियस या इण ऊं नीचे आ गयो है। आज सब ऊं कम 12 दशमलव 7 डिग्री सैल्सियस तापमान सीकर रा फतेहपुर मांय दर्ज करी ज्यो। जयपुर मांय रात रा पारा मांय सवा तीन डिग्री री गिरावट व्ही अर ओ 19 दशमलव 8 डिग्री दर्ज कियो गयो। मौसम विभाग आगामी रविवार ताई मौसम शुष्क रेहवण री संभावना जताई है।

000

पाली मांय ई दफा मानसून रे मेहरबान रेहवण रे कारण सिंचाई सारु 4 बार पाणी दियो जावेला। पश्चिमी राजस्थान रा सब ऊं मोटा जवाई बांध ऊं रबी री फसल री सिंचाई सारु नहरां खुलबा ऊं पैली जल संसाधन विभाग री ओर ऊं नहर री सफाई करी जा रही है। नहर री सफाई व्हेवण ऊं आखिरी छोर ताई रा किसानां ने सिंचाई सारु पाणी मिल सकेला।

000

शाहपुरा मांय आज पाणी रा गड्डा मांय डूब जावण ऊं 2 बच्चां री मौत व्हे गयी। पुलिस रे अनुसार अ दोन्यू बच्चा वां रा घर ऊं स्कूल मांय टेबल टेनिस खेलण री कह र निकळ्या हा। एक बच्चा री गड्डा मांय डूबण ऊं मौके ई मौत व्हे गयी, जदके दूजो अस्पताल मांय ईलाज रे दौरान दम तोड़ दीनो।

000

रणथंभौर राष्ट्रीय बाघ अभ्यारण्य रा कचिदा वन क्षेत्र मांय काल मृत मिल्या नर बाघ टी 86 रो आज छज्ज। रा प्रोटोकॉल रे मुजब अंतिम संस्कार कर दियो गयो। इण ऊं पैली बाघ रो पोस्टमार्टम कियो गयो। गौरतलब है के शनिवार ने उलियाना गांव कने एक जणा री बाघ रा हमला पाछे मौत व्हे गयी ही। ई वन हलका मांय टी-86 घूमतो हो। बाघ रा हमला पाछे वन विभाग रा कर्मचारी ई बाघ ने ढूढ रहया हा।